

Gallizia, de Seuilla, de Cordoua, de Murçia, de Jahen, del Algarbe, de Algezira, e señor de Vizcaya e de Molina, al conçeio, e a los alcaldes e alguazil de Murçia, e a los omes buenos que an de veer fazienda del conçeio, e a qualesquier de uos que esta mi carta vieredes, salud e graçia.

Bien sabedes en como Diego Perez Henestrosa, vezino de y de la dicha çibdat era vno de los treze omes buenos que an de veer fazienda del conçeio de la dicha çibdat, e agora por quanto el dicho Diego Perez tomo voz del traydor del conde, e entro en la batalla con el dicho traydor contra mi, por lo qual tengo por bien de le quitar el dicho ofiçio e fazer del merçed a Diego Alfonso de Tamayo, vezino de y de la dicha çibdat por seruiçio que me fizo.

Porque vos mando, vista esta mi carta, que vno de vos los omes buenos de y de la dicha çibdat, tomedes juramento en conçeio del dicho Diego Alfonso sobre la Cruz e los Santos Euangelios, que bien e verdaderamente vsara del dicho ofiçio, e guardara mio seruiçio, e conplira mis cartas e mio mandado, e guardara la pro comunal de la dicha çibdat e de su termino. E la jura fecha que lo reçiades e ayades por vno de los treze omes buenos que an de ver fazienda del dicho conçeio en lugar del dicho Diego Perez; e vsad con el dicho Diego Alfonso en el dicho ofiçio segund que mejor e mas conplidamente vsauades con el dicho Diego Perez e con cada vno de vosotros fasta aqui, e recodilde a fazelde recodir con el salario e derechos que al dicho ofiçio pertenesçen bien e conplidamente segund que recodiades al dicho Diego Perez fasta aqui. E los vnos ni los otros non fagades ende al por ninguna manera so pena de la mi merçed e de seysçientos maravedis cada vno. E desto vos mande dar esta mi carta seellada con mio sello de çera.

Dada en Burgos, veynte e dos dias de abril era de mill e quatroçientos e çinco años.

Yo, Gonçalo Ferrandez, la fiz escriuir por mandado del rey.

150

1367-IV-28, Burgos.—Carta de merced de Pedro I a Juan Ferrández de Palencia, otorgándole el oficio de notario y escribano del reino de Murcia con el obispado de Cartagena. (A.M.M., C. R. 1367-1380, fol. 3 r.º).

Yo el Rey, por fazer bien e merçed a vos Iohan Ferrandez de Palencia notario publico de Murçia, criado de Pasqual Pedriñan, do uos que seades notario e escriuano de todo el regno de Murçia con el obispado de Cartagena, e que todas las escripturas e contrabtos que pasaren ante vos en qualquier manera que sean firmes e valederas en todo tienpo como de notario publico.



E mando vos a todos los conçeios, alcaldes, e alguaziles, e ofiçiales de la dicha çibdat de Murçia e de todas las çibdades, e villas, e lugares del dicho regnado que vos ayan por mi escriuano en cada vno de los dichos lugares, que mi merçed es que lo vos seades. E non fagan ende al por alguna manera so pena de la mi merçed e de seysçientos maravedis desta moneda vsual a cada vno de vos.

Fecho en la çibdat de Burgos, veynte e ocho dias de abril era de mill e quatroçientos e çinco años.

Yo el Rey.

151

1367-IV-28, Burgos.—Provisión de Pedro I al concejo de Murcia, pidiéndole que dé a Juan Ferrández de Palencia el almotacenazgo por un año. (A.M.M., C. R. 1367-1380, fol. 3 r.º).

Yo el rey, fago saber al conçeio, e a los alcaldes, e alguazil, e jurados de la çibdat de Murçia e a qualquier de vos que esta mi aluala vieredes, que Iohan Ferrandez de Palencia criado de Pasqual Pedriñan que vino aqui a la mi merçed a Burgos a me fazer saber de las buenas nueuas que auiaades oydo de mi, e de las alegrías que vos auiaades fecho y en la dicha çibdat por mio seruiçio. E por esta razon pidiome merçed que le mandase dar vn mi aluala de ruego para vos los dichos ofiçiales en que ouiese un ofiçio este año de los que repartades y en la dicha çibdat el dia de Sant Iohan de junio primero que viene. E yo por las buenas nueuas que me traxo otorguegelo.

Porque vos ruego que por lo mio que le dedes ogaño el ofiçio del almotacenadgo de y de la dicha çibdat e que lo aya segund que todos los otros lo ouieron fasta aqui, que mi merçed es que lo aya e non otro ninguno, e en esto me faredes plazer e yo tener vos lo he en seruiçio.

Fecho en la çibdat de Burgos, veynte e ocho dias de abril era de mill e quatroçientos e çinco años.

Yo el Rey.

152

1367-IV-28, Burgos.—Provisión de Pedro I al concejo, sobre el mismo asunto que la anterior. (A.M.M., C. R. 1367-1380, fol. 3 r.º-v.º).

Yo el rey, fago saber al conçeio de la çibdat de Murçia e a los treze caualleros e omes buenos que por mi auedes de librar fazienda del conçeio, e a qualesquier de vos que esta mi aluala vieredes que Iohan Ferrandez de Palencia, criado

